

中國方志叢書·華北地方·第七號

據清·袁馥村等纂修影印

山東省

齊東縣鄉土志

(全)

咸文出版社印行



10107791

中華民國五十七年三月壹一版

齊東縣鄉土志

定價：新台幣一六〇元正

發行人：黃 成 助

臺北郵政信箱二二六〇五號


出版者：成文出版社

臺北郵政信箱二二六〇五號
電話：九二二〇一〇號

印刷者：正大印製廠

三重市長生街二號之一

內政部登記證內版臺業字第一一四七號



宣統二年仲冬刊

齊東縣鄉土志

齊東鄉土志序

中國郡縣皆有志或文辭奧衍或卷帙繁多競務爲文章之觀美未必能盡人而習之泰西各國皆以鄉土志爲入學之先務鄉土志者有舊志之詳核無舊志之繁重一展卷間而古今治亂胥瞭然矣

朝廷勵精圖治首重學堂

欽定小學章程分歷史輿地格致三科而以鄉土志賅之於是大府檄各牧令咸修其州邑之鄉土志賈昌來綰齊東篆下車伊始卽商之邑士大夫續舊令尹未竟之編纂嘗歎士人生長一方卽以鄉里之事茫然而不知其椎魯者無論矣卽一二聰穎之士於城郭

之建置沿革故老之流風餘韻以及山川形勢戶口多寡產物盈
虛亦不能道其梗概識者譏焉是豈才智之不逮歟抑所學未盡
善歟此鄉土志之修所以殊亟亟也仍延袁馥村趙仁村兩君主
纂事邑中紳佩分職其勞寶昌公餘之暇輒往就館中商榷肇始
於宣統元年越十有三月而告成分上下二卷其上卷目錄七曰
輿地曰歷史曰政績錄曰兵事錄曰耆舊錄曰人類曰戶口下卷
目錄八曰氏族曰宗教曰實業曰地理曰山水曰道路曰物產曰
商務凡斯邑之古轍今規皆燦然而大備齊東古劇邑鄉閭俗美
土地肥饒自黃河東注縣城當其衝官舍民廬皆頽於水光緒二
十年移縣治於舊城之東南三十里僻陋殊甚且迭次河決流離

蕩析民不能安其居其彫傲也極矣自頃以來河上五慶安瀾年
歲豐稔稍復舊觀而是書亦於此時告成然則邑運盛衰其機將
轉寶昌適承乏此間可不謂厚幸歟竊願邑之闕是書者聰明益
闢日進文明庶以答大府檄修是書之微意也

宣統二年歲次庚戌仲秋中浣知縣事葉寶昌謹序

齊東縣鄉土志目錄

卷上

輿圖

歷史

政績錄

兵事錄

耆舊錄

人類

戶口

歷史

齊東縣元析鄒平章邱地置

未置本境以前

唐虞三代屬青州春秋戰國屬齊國秦屬齊郡曰梁鄒縣

漢屬青州濟南郡曰朝陽縣後漢曰東朝陽魏因之

晉屬青州樂安國曰東朝陽縣

劉宋屬青州濟南郡曰朝陽縣又屬樂安郡曰臨濟縣

後魏屬齊州濟南郡曰朝陽縣又屬東平原郡曰臨濟縣

隋徙朝陽於臨濟鎮別置朝陽縣後復省入臨濟唐五代因之

宋析爲鄒平章邱縣地金因之

既置本境以後

元析鄒平章邱地置齊東縣初屬河間路後改屬濟南路

明屬山東濟南府仍曰齊東縣

國朝因之屬濟南府舊治近趙巖口自光緒二十年遷於九扈鎮

政績錄

興利

元探馬赤大德十年知縣事建學育才時使薄歛士民舉仰慕之
明黃堂河南內鄉縣舉人嘉靖二十五年知縣事興學禮士簡靜
宜民懇荒田清徭役平聽斷在任七年有黃青天之稱陞濟甯
州知州士民遮留爲立去思碑

許嘉榮雲南臨安縣舉人隆慶四年知縣事強明有幹略鋤豪抑
暴眾咸憚之創寅賓館建奎星樓尊經閣闢雲路街有興學作
人之功

楊玉潤河南孟津縣選貢萬曆三十年知縣事清廉簡靜與民休

息嘗爲便俗詩歌以化愚民會大清河水溢城圯鳩工修築之
又補葺學宮創建書院以興文化後陞歸州守囊空如洗士民
感之請入祀名宦祠

國朝翁慶標字孝定順天大興縣人康熙三十四年官丞齊東四十
七年陞知單縣未任卒於廨官斯邑十餘年中值歉歲鬻衣物
以賑民所活無算卒後入祀名宦祠子大德年十三邑人憫其
孤而貧賻贈八百金却弗受乾隆五十八年其孫方綱以內閣
學士視學山東按試濟南考專祠姓氏册見公名上書清廉明
三字肅然念先人遺愛在民歷久不磨因述其略以勒諸石建
於文廟名宦祠後縣治遷徙士林移石於長福鎮公立小學堂

之壁以保存之

蘇名顯字炳臣直隸交河縣進士咸豐九年知縣事清肅廉敏勤於課士月試生童輒爲筆削如嚴師時黃河改道由大清河入海每汎漲輒自永濟橋下順減河溢出民苦昏墊公率民遷橋築堰以爲保障埧河在縣治西南爲繡江入濟之路山水漲發沿河被災公晝夜住鄉激勸災民兩岸築隄不日告竣得免沈災者幾二十年後人名爲蘇公隄

吳士愷江蘇陽湖縣翰林光緒三年知縣事清慎仁恕值歲大饑捐廉賑卹賴以全活者無算每月集士子課試優給膏獎意在作育人才培養寒俊焉

惠廷魁字象樞直隸撫甯縣舉人光緒五年知縣事仁慈愛民殷勤課士縣治處河下游常苦水患公設法防禦不憚勤勞又積倉穀移書院建義學竭力經營汲汲如不及今猶口碑載道云宮耀月字竹樓山西繁峙縣翰林光緒二十二年知縣事廉平仁恕作士愛民時縣治初遷新建書院絀於欸乃以小清河斗稅稟充膏火費現改學堂作爲的欸二十四年河決上游齊境被災特甚公屢請鉅欸賑卹之全活甚眾後又修先儒伏生墓以興文教至禁義和拳以弭後患除蝗蝻災以保禾稼皆善政之可錄者厥後因勞成疾卒於任所

繆潤紱字東麟漢軍正白旗翰林光緒三十一年知縣事學問淹

博熱心教育改建學堂釐訂一切規則勞怨不辭創辦工藝巡警不遺餘力填河淤地爲豪強霸種公親督丈量招佃收租以作工藝之資本士民咸感念不忘云

去害

元高禧臨邑人知縣事政尙寬簡境內有妖虎設法驅逐患遂除明鄭敏河南均州人知縣事卹民勤政賦役均平時典史黃幹貪戒之不從而反被誣枉邑人上控力爭公得雪而害亦除入名

宦祠

國朝徐國珍貴州貴陽舉人初蒞任因頑戶詭書積欠甚鉅公力除夙弊不稍假借實有貧不能輸者設法賠補而累年之逋賦

遂清

余爲霖字惕區江西金谿縣舉人知縣事罷供柳清賦稅救災荒
寬限徵糧嚴革甲頭善政不可殫述康熙二十四年纂修縣志
有序

周以勳知縣事更定義莊地畝重修齊家橋祭田罷挑陳愷濤縣
志有記

陳寬字栗堂直隸安州進士道光十九年知縣事公廉嚴明政平
訟理暇輒至鄉村集父老子弟諭以孝慈禮讓民皆向化案牘
日簡盜賊斂跡去後民感誦不已爲立去思碑

陳世春字靜軒雲南舉人同治六年知縣事尙風節有膽識時捻

匪竄擾河北居民一夕數驚適有兵艦數艘牒城外偵者誤爲賊至城中人益倉皇失措公諭之曰果真賊當先入城今不爾非賊也遂上馬從一丁赴船偵視果黃統領帶兵防河眾心始安七月蕭家莊決口公督工合龍勤勞備至復請欸賑濟民皆感恩九月擒匪逼禦寇河南奪船欲渡公請莫統領協防河北賴以無恙後文方伯駐河北飭縣供糧儲公以民困不應由是爲上官齟齬不獲大用論者惜之

秦浩然字仲皋江蘇金匱縣監生光緒八年知縣事廉勤慈惠蒞任初填水入河之路久淤塞而兩岸順堤猶存夏秋水漲發由繡江河建甌而下水無所洩西隄圯填河以西彌望汪洋而

東隄尙完足以保障全境公親歷周視督民築守卒使危隄鞏固民免漂沒

李國愷字典岑湖北黃陂縣附貢光緒十六年知縣事甫下車適有蝗蝻災公日赴四鄰親率差役民夫竭力撲滅是歲蝗不爲災每月課士捐廉給獎以資鼓勵臨去任作詩貽紳耆意致纏綿士民感頌爲立去思碑

金玉璽字綬章歷城縣人光緒八年任縣營汛值河水陡漲同邑侯秦公督民築埝親指示險處忽岸傾丈餘墜入水中淹斃身後蕭條無以備殮紳民爭出資賻之

聽訟

明姚顯陝西咸寧縣舉人天順間知縣事公廉剛正斷獄不使鞭朴反覆諭以禮義民知愧服歷陞太僕寺丞入名宦祠

王上聞河南祥符縣舉人萬曆十七年知縣事敏練有威豪猾見之皆股栗不敢仰視遇樸愿之民則霽顏誘之使竟其說於是奸宄歛跡良懦伸氣幾致刑措縣志有傳

白鯤直隸南河縣舉人萬曆二十五年知縣事誠信動人慷慨任事數平反大獄解釋無辜縣志有傳

國朝曹榕河南河內縣附生光緒二十年知縣事寬明廉幹摘姦發覆不巖而威民莫敢欺時縣治初遷舊城墻垣多圯伏秋汎漲河流激衝居民厄於水患危甚公親勘憫然稟請撥欵築埝捍

護在城之人賴以保全

孫紹曾字詒堂直隸蠡縣舉人光緒二十七年知縣事嚴明強幹聽斷如神凡有爭訟兩造至前公審視其人良誘立判不使鞭朴各得其情濟陽刁民霸種高家圈五莊地一案構訟連年未能訊結公到任請委會勘並同濟陽縣知縣丈量明白立定界址各息爭端兩免拖累而又注意學務籌款增設並捐銀爲之補助不遺餘力治境貧瘠復爲十年種樹之計令民於小清河兩岸栽柳二萬餘株預備學堂巡警之費雖值天旱成活無多其用心亦良苦矣公兩宰斯邑皆以興利除弊爲念惜回任未久歿於任所

人追念遺徽請祀鄉賢

張思訓字彝堂城東宋家莊人性豪爽有膽略尤能以舌辯屈人咸豐季年捻匪倡亂四鄉以團練自衛眾推思訓爲長十一年八月賊擾縣境逼崔家莊蜂擁而來團眾皆有懼色思訓集眾長議曰今賊勢浩大彼眾我寡人心已搖不若整隊以待我隻身親見賊酋與之講理如寇聽我眾之福也不聽勢無可逃再決勝負未爲晚也乃單騎入賊壘與其渠魁舌戰多時賊屈於論辯又服其膽略許不復肆擾思訓猶慮其叵測難信彼乃予一小旗賊眾望見卽退去繞城四十餘村莊遂得免焚掠之害張承祖邑庠生趙奉酉站人年八十多智略咸豐辛酉八月捻匪

入境糾眾築堡抵禦一村得免於難至九月賊復由東而來攻破中站東站惟西站尙無恙次日黎明賊匪麇集團攻復與弟述祖子庠生汝瑾率眾竭力防禦無如眾寡不敵勢難兼顧賊突從東南門入眾皆潰去承祖父子兄弟誼不忍舍同時遇害其婦女投井懸梁者六七人孝友節義蓋萃一門焉

王方田爲人慷慨遇事敢爲咸豐年間各處共辦鄉團舉以爲長團以得勝聲名操練有法辛酉二月賊擾周村鎮鄰近鄉團皆領眾據險防堵公與副團長閻法參禦賊於開河督眾奮擊斃賊無數團勇死事者亦多若閻法唐邢思武張法堯李秉剛潘進蓬王永福崔萬禮蘇大有等三十三人俱憤勇爭先力竭陣

亡至八月復擊賊於卜家道口賊耳其名恨甚重圍之公冲圍殺賊與其子同時被虜罵賊不屈死事甚慘云

閻法參字貫一從九品平居排難解紛人多服其公正咸豐季年舉辦圍練與王方田同爲團長二月間禦賊於開河督眾奮擊賊死傷無數餘賊遁去齊境賴以無恙而蕪眾死事者共三十三人蒙王邑侯驗勘卹殮至八月復擊賊於黑里寨闖入重圍幾不復出幸子姪捐軀力救復脫於難而忘身死事者若閻法騫韓思謹等又一十七人

趙桐芳字琴堂性慷慨有勇略同治丁卯髮逆犯境率鄉勇百餘人在五龍堂南列陣以待翌日賊騎率至桐芳令以火鎗衝擊

所向辟易無敢當其鋒者再戰再捷斃數十人傷者無算賊棄
驟馬散去逮夜二鼓溝南香火徧地又值大霧杳不見人桐芳
疑爲賊令眾放鎗藥幾盡渺無聲息不意賊出其背後步騎環
列已在重圍中矣桐芳執刀棄鎗大呼殺賊勇多受傷而桐芳
被創尤甚自知無生理更奮勇格鬪手刃十餘人力竭赴石崖
下沈水而死以事後不及呈報蒙卹典聞者傷之

李昶旻李耀豐皆有幹濟才同治七年擒匪擾東省倡捐巨資協
辦團練晝夜防堵審知北門外大清河一帶與惠民毗連首當
賊鋒防守尤力五月間賊匪擾惠民突至北岸奪船爭渡一城
惶恐二公督率團勇沿河列陣然炮轟擊賊不復渡官軍繼至

宋史 卷一百一十五 金
三
賊眾潰去而城池人民得以全安皆二公之力也

王永綏 邑庠生字吉安廩貢生廷桂子也咸豐十一年八月捻匪自濟南東竄王永綏率鄉勇在章邑王家橋設險據守藉資保障賊出敢死軍屢次衝突團勇受傷眾力不能支王永綏且戰且退身被重創猶奮勇擊斃馬賊十餘人而死

趙鶴齡 字梅仙武庠生慷慨有膽略咸豐辛酉九月賊攻趙奉站梅仙率兄弟鄉人以弓矢禦之傷賊數十人明日賊率眾復來竭力環攻勢不能敵遂率眾登樓仍禦以弓矢賊受矢傷者多恨甚從旁屋挖地洞將樓焚毀身無所託遂冒火躍下罵賊不屈遇害至慘

盧殿安李家碼頭人咸豐時捻匪竄入章邑村人丐公往章邑偵探虛實途中遇賊被害眾憐之具衣衾棺木以殮未及葬賊忽至焚其棺爲灰燼眾益傷之集公費以厚卹其家

胡元祥張虎鎮人附近二十四莊之團長也賦性豪爽有俠烈風同治初流賊肆擾元祥集練勇嚴守禦突有匪股竄入縣境已趨麻姑堂北窺一帶村莊元祥率眾出禦依防水長隄列陣以待賊望見旗幟飄揚器械林立不敢逼先遣游騎窺覘虛實元祥偕壯健數人離隊而出遙謂之曰歸告爾酋能戰則進何狐疑爲賊相顧驚愕遽爲引去時已昏暮元祥令各村乘高然炬以壯聲威賊愈疑懼夜遁去一方賴以安全人皆服其智略焉

寇蘭亭字序堂邑庠生性狷介有宿學辛酉之亂率眾禦賊保護
村莊後賊勢猖獗力不能支遂罹於難其養子興義有至性事
急不忍獨生屢以身蔽其父賊並殺之

耆舊錄

孝義

明趙完字介石崇禎間貢生母有疾方須乳肉厭難之完惻然自割親遂愈

國朝張夢蛟字季鱗順治丙戌進士有孝友聲父隱君喪廬墓三年旦夕掬土墳高丈餘

王璣字玉衡有孝友聲平生高氣節厚交游常排紛難時論多之後由歲貢任江南上元縣丞

張翼飛字圖南順治歲貢惟登長子也性孝友尚義急公濟饑焚券邑人稱之鄉祀鄉賢

彭鯤字扶九康熙歲貢冲和雅筋龕衣糲食泊如也排難解紛談
笑道之無不愧服其天性仁孝尤不可及值范經略叛守父樞
不去寇索鏹欲斷其首公曰就戮樞前得死所矣寇感其孝遂
釋之

張翰原名天彝字子常廩膳生性孝友讀書知大義父惟養參藩
中州時翰隨任署中朝夕奉侍無間寒暑順治十八年父奉
旨引見卒於王事翰聞訃哀毀骨立而歿

張可大趙奉站人好讀書康熙丙子舉於鄉兄弟四人共讀友愛
如孺子家築土樓題額於其上曰做華蓐

張九仞字成山乾隆貢生事親不就職親病篤身侍湯藥不解衣

而寢者百餘日

張大成字信之廩生性誠篤善排解鄉人有爭鬪者或出資以解之邑侯贈以額曰飭俗維風

杜永敬字肅菴乾隆戊子舉人才思淹博下筆成文受業西野張先生親得其傳西野卒無資以殮代爲經紀葬亦如之且勒石於墓見之潸然朔望必具食以祀

王亮圖字漢臣武庠生嘉慶八年黃水爲災築隄防護莊村蒙撫憲鐵查奏 恩賜八品職銜並匾額題義全梓里

張龍標字準亭武庠生年五歲而孤母康氏苦守冰霜年百有三歲而沒公廬於墓側負土成壟朝夕奠哭不茹葷不修容和衣

而眠請於縣送入節孝祠

成秉睿字錦若武庠生事親有至性養生送死曲盡其禮蒙督學使者舉優行以孝思不匱榜其門

杜成才字雲峯代弟成務坐獄終身無怨言並無德色遠近稱之李觀海字仙洲咸豐乙卯恩貢侯選教諭天性豁達見義勇爲咸豐五六年埧河爲災邑侯蘇派爲總董率眾築隄南接章境北至延安鎮隄成邑免水患者二十載及同治初年捻匪四擾各處興辦團練乃督鄉民築長圍一道西起埧河東接減河率練勇據險共守晝夜巡防得保無恙

王志範字洪九國學生咸豐九年防禦埧河保衛莊村蒙邑侯蘇

獎給義重鄉閭匾額

李墅字寄齋邑庠生幼讀書輒有異解出人意表師友器重之中
年遇目疾盲於視猶與邊蔭棠等結一義社爲鄉里排解不辭
辛苦光緒十一年黃河入濟派築遙隄諸村推爲社長與官紳
籌畫勞瘁備至隄成得獎五品銜

周鴻霄字子賓歲貢生候選訓導舊城東董家莊人少失怙母李
氏教戒極嚴嘗進而訓之曰吾家雖不甚殷實束脩之資尙無
缺乏汝須奮志讀書力圖上進以慰吾心儻染紈袴習必不汝
宥公承母教朝夕攻苦無間寒暑於經史子集皆能博學而約
守之雖貢入成均而未博一第終以爲負母訓公旣歿選授定

陶縣訓導

高桐字嶧峯九扈鎮人家素寒嗜學無力從師耕耨之暇堅自攻苦性聰敏經史大義過目輒了悟其爲文筆致洒落有奇氣游庠後試屢冠軍鎮去舊城較遠士子應書院試恆苦跋涉乃結文社推先生爲師得其指示而成名者頗不乏人先生品行端方言論持正一鄉且奉爲模楷云

王汝霖字雨巖咸豐己未副貢任內閣中書光緒五六年間河水浸刷城垣公捐修石壩數處危城得資捍禦東皋書院欸緘將廢公倡捐銀兩以資膏火蒙撫憲周奏請加侍讀銜七年填河決口將爲巨患卽於南門外趕修隄堰長約四五里躬自督率

晝夜防護城中得免於患復蒙撫憲任於河工案內奏請得優賞

楊乃驊字星房同治庚午歲貢識見明通性情渾厚能謀善斷持正不阿在家教授生徒濟濟皆因材以施讀書外兼治岐黃一經診視沈疴立起咸同年間黃水爲患一切埧河築隄黃河修堰籌賑濟民廂埽送料及修書院練鄉團凡邑中公事莫不資公襄助故士民敬服之後選授費縣訓導蒞任後訓士之餘于地方利病考求極細縣內有要事官紳皆樂與商推必推誠相告故當事奉爲儀型而費境人民亦得所庇蔭云

張汝海字星源廩貢生因河工保舉訓導歷署壽光商河訓導鉅

野教諭東平州學正兄汝灃好使酒公朝夕規勸卒爲改過弟
汝漢鄉鄰有事多求排解公常以平盛氣戒疾言相勗門庭雍
睦爲鄉里所矜式云

邊宗奭字蔭棠附貢生幼孤事母以孝聞母多病躬奉湯藥衣不
解帶者數年及母卒形容枯槁鄉人至有不能識者初因母病
攻醫學遂精其道全活甚眾復多蓄良藥施於有疾而貧乏者
歲以爲常不受謝城西填河數爲邑患與李仙洲鳩眾築隄以
故填河以東不被水患者二十年又與附近諸村結仗義社以
除暴安良爲務自是民賴以安村廡不吠邑侯何稱其有功於
風化者不少

郭景乾字子元廩貢生少失怙事母以孝聞性伉爽見義必爲啟
廸後生終日無倦容歸蘇舊有申明亭一所年久頽圯卽其遺
址改建申明義塾爲教育人才之地造就甚眾今之公立小學
堂卽其處也壽七十有二鄉人榜其門曰德碩望重

劉恩瀛字幼泉廩貢生剛直能任事舊城西南寄篤塚卽漢儒伏
生墓後人誤建泰山行宮於上先生惻然謂無以妥靈爽具稟
當道將行宮移建他所而墓之周圍葺以墻垣禁樵採更於墓
側建造饗堂春秋奉祀並設義塾於中嘉惠後學今改爲記經
小學堂

王駿烈字勳臣同治癸酉武舉性和藹無疾言厲色與弟增貢生

駿聲友愛備至公嘗謂之曰兄弟手足也世之爭產析居者皆由於各私其子吾二人盍易子撫視以敦薄俗弟如其指遠近聞之皆歎服後駿聲子興賢由拔萃科領癸卯鄉荐駿烈子興能亦餽於庠人以爲友恭之報云

張爲和字祥甫附貢生少失怙性純篤事兄爲中甚敬母氏李年老病癱瘓左右護持不解衣者十二年以故鄉里高其行又嗜義若渴凡有關風化之事輒身任之如代生墓申明義塾皆其倡捐而創修者也邑侯宮榜其門曰好義急公

學問

明江騰蛟字元宿萬厯丙午舉人體若不勝衣而精神炯炯有萬斛思爲文下筆千言立就善楷書尤長於古文詞所著有蒙引刪次管韓批評清福錄友古編等書行於世祀鄉賢祠

國朝任國柱字宇泰性冲和邃於易經明行修邑中知名士多出門下由歲貢任冠縣訓導鐸化聲稱至今不替

張天經字孝儒號魯厓參政公惟養次子由廩生恩膺入監候選知縣生而穎異過目成誦兼工書法所著有刈軒史囊

張思廉字介庵乾隆辛未由歲貢司訓濮州工書法濟陽刑部員外艾公恂贈聯云性寒羶亦寒萬丈蒼煙纏古柏心正筆卽正

雙鉤妙墨值金錢卽此想見其爲人

張權時字宜之號可庵好儒術篤守濂洛關閩之說而於考亭四書集傳尤能探其奧窔所著有四書析疑及尙書析疑等書並行於世居恒以誘掖後進爲己任執經者屢滿戶外遇有疑義先生口講指畫發前人所未發自朝至夕無倦色一時遊其門者多高第弟子若進士趙鏡朗孝廉杜永敬輩其尤著也晚年以歲進士訓導掖縣卒於官及文宗 喀視學山東諭諸生曰可庵先生所著析疑諸書逐句逐字皆精當不刊學者宜奉爲科律一時爲之紙貴嘗自言生平行事願以四書朱傳爲註脚而常苦未能鄉人景其賢立祠祀之

張肅雍字相維可庵先生猶子也少爲諸生深得可庵之學善誨人尤喜獎拔寒士鄰村杜孝廉永敬自幼從之學家貧困常不得食每自館退少選卽至公廉得其情而飯之不復遣其家食後館於外亦必挾與俱往且分金以濟其不足故邑中寒俊皆慕其義而願列門下者踵相接焉後以明經任掖縣訓導年八十餘而卒門人素服治喪朔望多詣墓以祀

胡象賢字贊公康熙戊子舉人已丑進士家貧力學以聖賢自勵不求宦達惟以誘掖後進爲心一時賢俊多出其門

趙鑑遠字鏡朗雍正甲辰進士部選蘇州府新陽縣知縣幼從可庵先生受業凡修身講學篤守師訓及蒞任恤士愛民頗著政

聲

范執要字簡庵乾隆辛酉拔貢庚午舉人任平度州學正天性孝友勤學忘倦教人讀書以勵品行爲先故家學淵源流傳數世至今奉爲楷模

李曰商字質堂乾隆庚寅舉人勤學好問至老不倦及列膠庠尤延名師受業手不釋卷寢不解衣後任榮城縣教諭與門下士講學論文循循善誘士風爲之一振

仇陳錫字禹九歲貢生好讀書邃於理學直欲登朱儒之堂而啜其馘所著有四書聯脈一書以未及付梓而散佚幾盡所有惟學庸聯脈而已讀者憾之及病革將易篋呼諸生至榻下講至

誠盡性章而卒

潘連清嘉慶壬寅歲貢生學問淵博德行純粹村中無力讀書者輒設法獎勸之以造就後學爲己任其他息紛爭化頑梗尤足爲多士楷模學者稱爲玉田先生

周朝奎字聚五號澹園董家莊人生而聰穎讀書數行下博習羣經兼通諸子百家說爲文奇闢自成一格始修舉業精制藝後復舍去專肆力於古文詞尤嗜翰墨工草書所著詩文集稿俱以澹園名惜卷帙散佚無存惟草書間有存者人皆什襲珍之

嘉慶壬辰 恩賜舉人癸巳一體會試登進士官國子監學正

朱汝桐字鳳翮號琴園道光壬辰副貢候選直隸州州判公賦性

渾厚幼嗜讀而才稍魯始授書不善記憶遂憤發於心而人一
己百以求之凡經史子集精理名言必成誦在心而後已故一
時學者皆聞而退舍不敢與之抗其爲文樸茂淵懿不尚詞華
惟解釋名理闡發精蘊直出入於章羅之間而融其跡象居恒
教授生徒必以讀書明理爲宗其子麟紱道光己酉拔貢能讀

父書講實學

成毓呬字雨峯號石軒道光乙巳恩貢任博興縣教諭品行端方
志趣洒落工書隸草初師顏平原後出入山谷石庵諸家年八
十餘猶日臨池不稍間故晚年書法絕去町畦自成一格姪汝
洲乙丑恩貢孫守謙乙亥恩貢其家學綿衍又爲一鄉之冠故

章邑舉人甯廷莊先生贈三世承恩額以美之

李國樞字斗南道光歲進士才思明敏學問淵博所讀之書輒發
抒新義加旁批外註下筆成文不假思索自爾超羣拔俗然寡
言笑喜肅靜親友到門輒避之惟接生徒勤教授嘗終日無倦
容

李培字雪堂號裁之道光丁酉拔貢天性孝友才思淹博生數歲
而母卒哀毀骨立苦臥不能起及長事繼母孝養備至宗族爲
之感泣有弟三人視之如左右手飲食教誨無微不至幼時就
伯父斗南公受業於書無所不讀作時藝下筆千言未嘗加點
竄尤嗜經古學嘔心碎肝必求其主而後已同治庚午應省試

首場已疑魁選以二場空白二格被斥與試者深惜之公爲人樸厚長於詩選物必詠詠輒抒其懷抱有三百篇遺風焉著睡餘軒詩集二卷膾炙人口後嗣皆以詩學世其家

張振東道光乙酉歲貢爲人廉靜寡慾端方正直性嗜讀凡經史子集以古今試帖皆有端楷繕本以備觀覽歿後所抄書籍尙存十餘筒惜被水患漂沒殆盡生平教授生徒因材施教始終無倦意一時共稱爲青園先生

魏振南字壽嶺號曉塘咸豐壬子歲貢任鉅野縣訓導著有學庸講義

袁光斗字文峯生有宿慧讀書不勞強記下筆爲文抉發精義輒

出人意表筆端頗多奇氣書法尤工及肄業溧源書院枕扉經史學業益進咸豐乙卯鄉闈已擬魁選因二場用典稍僻抑冠副車揭曉後進謁座主慰勉肫摯無如身弱多病賁志以歿士林惜之

袁思振字惺堂諸生少失恃賴叔母鞠養及成立後教授生徒取修脯以供甘旨其餘文章經史皆能發明奧旨擇精語詳而其要壹以躬行爲本蘇公炳臣撫齊時號能造士於稠人中尤激賞先生期以遠到壬戌貢入成均選授黃縣教諭以先行後文教士遊其門者莫不悅服晚年好吟詠著有靜吾詩草待刊

趙廷棟字松岩幼讀書能強記凡六經內外註無不成誦在心後

入監肄業考取天文生預知陰陽休咎精堪輿善岐黃自製膏丹藥餌施送數十年無懈志而於喉症尤爲精絕所著醫書數種因水患漂沒惟占驗書一卷尚存其純孝發於天性年近七十而事親無衰飲食起居猶親自省視戒子孫勗曾元一皆有禮可法同居五十餘口悉秉家訓無間言壽七十有四無疾而終鄉人追思爲之立碑頌德

劉春暉字和暘廩貢生博習經史尤工於詩著有養心齋詩集任嘉祥縣教諭諸生奉爲模範及解組家居尚禮節敦仁讓里黨化之邑侯何公履甫數臨其家問得失然公性耿介不輕至宰室

時長塘字椿垣同治癸酉拔貢性情豁達才思英發晚年教授生徒
徒先器識後文藝故一時出其門者多幹濟才焉

成汝洲字會瀛恩貢生候選教諭自幼嗜讀書文名噪於當時
篤性成與人交無城府無矯飾非分所得一介不肯受人尤善
裁成後進所爲文能斧藻羣經一習空疏之陋門下從遊多知
名士而公顧屢躋棘闈艱於一第好學之心老而彌焉

名宦

明耿通府學生洪武壬午舉人任刑科督給事中以諫顯擢大理寺卿縣志有傳

張夢鯨字仲麟官至陝西巡撫贈兵部左侍郎天性忠孝十一任皆有政聲功業載國史縣志有傳

國朝張鐸字聖宣號木菴七歲能文十五食餼康熙己卯舉於鄉丙戌成進士任湖北安陸縣知縣歷署應山孝感縣知縣德安府同知在任蠲逋賦免雜派尤能平反獄訟培養士氣行取

丙召將膺簡擢惜丁外艱服未闋而歿

張思恬字退菴康熙甲午舉人

特簡湖南東安縣知縣卽補江西德化縣知縣護理九江府同知公素性孝友嗜學能文及出宰民社廉明平允百姓銜恩蒞任七載案無私牘囊無私蓄江西巡撫俞公賜之匾曰清慎勤

張思振字興菴太學生由福建興化府通判累陞至汀洲知府調金華府知府所在政治廉明片言折獄闔屬敬憚吏莫敢欺守金華十年興利除弊務使實惠及民其甄拔士類尤能嚴抑倖進擢取真才去官後士民懷思立祠祀之

康世純字秉元雍正乙卯科武進士由侍衛班出任湖北武昌營左衛守備公在營恩威並施士卒用命各就約束奉派征剿至民間秋毫無犯

張靈萃乾隆己未武進士初授河標提塘繼任江西南昌營守備
後陞都司生而沈毅有幹略每逢征調能與士卒同甘苦繼以
軍餉缺乏解任歸

劉武貴字專一乾隆壬戌武進士任江南安慶衛守備素明大義
勇力絕倫遇事談方略指陳詳明暗與古人相符

王右弼字萬長號亮齋歷任福建德化臺灣知縣累遷汀福泉臺
知府兼權督糧鹽法兵備等道擢臺灣道兼理學政時生番出
沒臺郡北路賊殺平民以得首爲大彩公嚴加厲禁番乃歛跡
漳泉多洋盜官弁邀功輒羅織無辜民冤莫訴公白其事乞大
府撤捕盜令力爭之乃得免會兵眾索餉勢將鼓噪公挺身而

出從容勸諭皆就約束

胡璣字君瑞號敬亭居家以孝聞好任恤精武略由武生連捷乾隆十九年補福建漳州鎮標守備屢擢至福州副將權海壇鎮總兵時海氛不靖公立制森嚴搜捕有法不數月悉除其醜餘黨望風遠遁迨解組歸里謙退如常人遇利害關係必力爭爲鄉里倡如罷開陳愷溝有功於邑者最鉅其他好善樂施詳載縣志

張之晟字際隆任江西瑞金縣典史有吏才善騎射時邑多盜晟勦捕有方盜皆斂迹不敢入境民賴以安

張鉅環字文軒由吏目借補湖北南漳縣典史吏治卓著委署孝

感縣縣丞

李化龍字禹門號伏遠子詩公之次男也乾隆二十五年由武舉成進士 廷試二甲躋侍衛班後出督閩外荐陞至總鎮都督水師提督往來滇閩粵三省三十餘年其南征緬甸西平金川大小百餘戰而瀕於死者數次及勦臺寇討安南尤多用奇兵疑兵以制勝其將略之善常得

行優獎乾隆五十四年復征安南過富良江失足墜水而歿事聞詔賜優卹崇祀昭忠祠并以其事纂入國史士論榮之

李毓桂字天香禹門提督之子也乾隆丁酉武舉以父蔭襲騎都尉幼讀書識大義其果毅勇猛有父風任沂州營協標中軍都

司以營規整肅屢著成績推陞至廣西提督前營遊擊

李國棟字念僑性情狷介能詩文下筆立就惜不自檢拾稿多散佚以祖禹門公之廕襲騎都尉歷署文登膠州臨沂州營都司後署高唐營壽張營遊擊

張可考字慶旋乾隆乙酉拔貢授曹州府觀城縣教諭蒞任六載以振興文教爲己任士大夫仰爲師範焉

李士鑛字鋒書性嚴毅遇事果敢由雲南按板井鹽課司擢授平彝縣知縣鋤豪抑暴民大畏服累遷至馬龍州知州甫下車聞有惡僧爲民害凶焰甚熾差不敢緝公率丁役捕治之民害以除士民爲立德政碑及致仕旋里以陳愷溝送經罷挑慮反覆

公同張爲銘等呈請邑侯周公載入志書以垂永久

李敦業字雪樵道光乙酉拔貢甘肅候補州判時回逆張格爾燧亂大軍西征委赴榆關轉餉并在衝途甘州一帶辦理兵差馳驅四載卓著勞績以隨營改官廣東厯署佛岡綏猺新安乳源各廳縣所在有政聲旋因鴉片肇釁英艘擾粵以軍功晉秩郡守賞花翎署潮州府兼權鹽務公轉道光二十七年丁母憂服闋授肇羅府時髮逆蔓延督兵勦防累功升授肇羅道咸豐四年調福建督糧道粵督以軍政旁午奏留肅清後再赴閩任是時股匪並起勢益猖獗七月間倉猝圍城糧援俱絕賊蟻附而登公督守陴兵燃礮轟擊賊復糾大股進攻城陷猶手刃數人

卒以羸寡不敵遇害事聞 朝廷恩卹雲騎尉世職崇祀鄉賢

祠

李蔭棠字翼召邑庠生光緒十年由孝廉方正選四川瀘州州判
抵任後編保甲設團防以清內外奸宄故匪徒斂迹邊素多爭
訟公減罰輕刑務使民寃盡伸又仿社倉法積穀五千石分存
四鄉以防凶饑於文學尤注意九姓學額八名公稟學憲添考
收錄和山書院公首倡捐資爲延主講并月課加獎在任十餘
年士人感其德爲立去思碑旋調忠州州判因州尊丁憂兼攝
州篆卒於任

鄉賢

明張璣字宗璿景泰辛未進士任雲南道監察御史性聰慧過目成誦惜不祿無嗣

孫珉字宗理與張璣同榜進士任戶科給事中嘗陳時弊報可通行中外詳見奏疏後以忤權貴歸有詩集行於世歿祀鄉賢祠馬龍字天祥成化進士任刑科給事中謫陝西岐山縣縣丞復累遷至浙江布政司大叅江西左右方伯所在卓有政聲祀鄉賢祠

祠

張民綱字勉菴隆慶丁卯選貢爲人醇謹雅正與弟民範友于無間令清河以清德聞或勸之取公笑曰吾刻意作清白吏不亦

美乎竟不聽居七年以最聞擢應州刺史未之官卒百姓爲立
去思碑

郭寬字涵之斗南子也萬曆壬戌進士歷署至寧前監軍道副使
時餉缺兵變執袍而噪禍幾不測公借鈔插盟履伍解圍悉聽
命奉約束邊境復安後憂勞卒於官贈太僕寺少卿

國朝張惟養字龍涵官至參政卒錫封廕祀鄉賢嗣縣志有傳

李可起字興東雍正己酉武舉主持家政力崇節儉惟讀書習武
不惜費其姪化龍以武進充侍衛在京日用皆取給於公而無
所吝

李捷三字子詩乾隆歲貢生有異質性情慷慨遇親友有困乏者

輒周卹之次子化龍秉節鉞建殊勳咸以爲施濟之報云

李毓芝字墨圃嘉慶丁丑歲貢候選訓導天性忠厚待人無厲色故鄉里欽佩之遇有紛爭一經排解眾自愧服輒散去

李芳椿字壽圃嘉慶癸酉順天舉人考取內閣中書陞任典籍歷充文淵閣檢閱軍機處章京選授廣西南甯府同知致仕家居樂善好施至老不倦

趙盛南性仁厚忠恕凡立祠勸學修橋梁治道路皆捐金以爲之倡故鄉人愛敬之卒年九十歲子孫蕃衍不析爨者五世共六十餘口後知縣董瑄贈以額曰五世集慶

張芹字蘭輝廩貢生生平坦易質直經明行修選授兗州府儒學

訓導

李芳若字玉泉附貢生昌陽鎮人端方公正好善樂施有族人紹
貴家赤貧死不能葬代爲治棺並贖以金卹其家後赴章邑夜
歸遇盜持兵強逼勢不得脫乃下車自責曰我李某終身行善
問心無愧何乃遭此盜聞名輒羅拜曰誤觸尊駕幸勿罪遂散
去鄉人聞之以爲有彥方之風云

張會寬字子厚少遇異人因遷於岐黃之學四方求醫者戶外屢
恆滿貧者與以葷餌不受值以此全活甚眾子孫蕃衍五世同
居邑侯何榜其門以獎勵之

趙清芳字炳耀國學生性孝友自幼失恃事繼母以孝聞居鄉恂

恂如不能言及臨大節志不可奪咸豐辛酉捻匪入境家被圍
父與叔父及兄弟子姪各執火鎗短刀拚命殺賊時祖母年高
乃負之以逃自辰至申始得脫合家亦幸無恙居恆嗜醫書頗
精其術兼治藥餌施送貧困全活無算歿後鄉人高其誼立碑
墓前以表之

劉雲龍字應堂光緒庚辰歲貢性剛方篤信程朱之學身體力行
誨人不倦端謹之士多出其門焉

李紹亨字次元稟性謹厚幼讀書師爲講解輒問曰書言甚善可
仿而行之乎師異之曰讀書能實行去聖賢不遠矣年漸長益
潛心經義動作有法晚年事親依然孺慕與朋友往來不輕然

聖賢集卷之三
卷之三
諾鄉里有貧無以葬者量爲資助婚亦如之平生無忿厲無競
爭久與游者亦薰其德而爲善良云

程懋官字德譜性謹飭樸厚遇橫逆夷然不以爲忤偶拾遺物輒
坐守以待失者家業小阜以水患蕩其資財一貧徹骨然好讀
書雖極顛沛手一卷誦聲恆達戶外云

節烈

明汪氏周氏武氏巡撫張公夢鯨側室也公憂勞王事卒於邊三氏坐卧一樓十年不下崇禎間城破遂積薪自焚死

國朝毛氏叅政張公惟養妾侍公五年公卒於王事慟哭不食人勸之曰公食乃食積四十六日而卒祔公墓

戴氏副使公聖聰女爲張翰繼配翰以父叅政公歿於王事哀毀卒氏誓同死以前氏女尙在襁褓乃守節撫養之恩踰已出

劉氏儒士趙瑩妻順治三年謝寇叛擾劉家鎮氏遇賊奮臂厲罵挺身迎刃立遇害後三年啟葬於掩埋處膚髮如生見者異之郝氏名簾字秋岩邑廩生張鳳鳴妻齊河進士郝允哲之女七歲

而孤讀父遺書能知大義願工詩文年二十餘歸張氏生一子始能言卽令讀書未幾夫亡子亦夭慟哭欲絕以姑老不敢捐生重傷其意嘗作詩述志哀痛纏綿讀者隕涕後邑侯時銘題贈長律有女史傳家學遺經淑厥躬才華謝道韞孝行叔先雄石破天奚補鵲啼血已紅等句以紀其實所著有蘊香閣碧梧軒恤緯吟詩集三卷濟陽知縣李若琳出資刊板行於世

李氏王芳興之妻邑李珍之女也性堅貞年十七于歸繼姑無行氏奉之唯謹姑與前夫女欲迫以非禮氏常以白刃自衛嘗語人曰身可死志不可移然心惴惴自顧一弱女子恐終不能保遂閉戶自經死姑竟誣以不潔遽瘞之既葬墳裂再築之又裂

如是者三時邑侯陳公栗堂仁明善斷氏母家以狀聞公廉得實拘其繼姑與前夫女嚴鞫之堅不承陳公乃邀鄰封會審開棺檢驗卒得昭雪請旌表建坊崇祀節孝祠

曹氏楊毓輝之妻年十七于歸毓輝喉病垂危張目視氏曰我無兄弟父母高異日孝養惟子是賴氏聞言大痛哽喉不能成語乃禱於神願以身代毓輝卒不起不數日氏哀毀亦卒學憲張奏請旌表

崔氏年十七字趙可訓爲妻未及嫁夫染病歿氏聞訃哀泣不食及葬親臨夫穴欲以身殉戚鄰強之歸至夜潛入靜室自縊死後蒙學憲黃奏請旌表

張氏潘俊三之妻于歸後克盡婦道鄰里稱之咸豐辛酉捻匪入境氏被擄時年二十一歲賊豔其色欲迫以非禮氏罵不絕口賊復令同被擄者甘言相誘氏罵益厲賊怒遂遇害邑侯劉詳請旌表

劉氏孫甫松之妻年十七于歸未及五載夫卒遺一子尙幼咸豐辛酉捻匪擾境鄉人走避氏念家無長男舅病垂危妾若去舅將奈何遂攜幼子侍左右會賊越道而東竟得免舅病亦尋愈撫憲丁奏請旌表

王氏宋振鵝妻年二十七夫亡未及葬適捻匪突至氏一身翼翁姑奮臂詈罵遂遇害於夫柩之側翁姑得免殮時面目如生光

緒十六年蒙撫憲趙奏請 旌表

張氏孫守傳之妻幼時父大受授以烈女傳輒能通曉大義子歸後以孝聞年二十九夫亡遺孤子三女一舅年垂七十病偏枯飲食起居不能自適氏事之維謹翁病久心躁稍不如志惡聲立至氏惟霽顏引咎而已學憲汪以冰霜勵節四字額其庭

康氏張大志之妻年二十五夫歿遺孤龍標僅五歲氏誨以義方家貧紡績自給三十餘年未嘗窺戶壽一百有三歲蒙學憲于題奏 旌表崇祀節孝祠

宋氏李會堂之側室性貞靜明大義其夫病篤曾割臂和藥以療夫病鄉人至今稱之

張氏增生宋若臨之妻夫亡晝夜悲泣三日自縊而死道光九年

奏請 旌表

劉氏幼字韓春華氏家貧遵父母命養於夫家甚得舅姑懽未及
婚而夫病故女痛不欲生戚黨勸之暫歸母家女眷念舅姑常
往省視其父母憐女無歸議改字女泣然流涕曰身已許字韓
門又久蒙其恩養雖婚禮未成與已嫁何異人皆知為韓氏婦
矣如夫亡即他適何貴此不貞之女為必欲相強有死而已遂
乘間自縊母家從其志歸葬於韓至今鄉人猶爭道之

人類

本境自昔爲腹地民皆漢族偶有他族流寓於此去留無定無
占籍者故不錄

戶口

自黃河改道東省凡由省治迤東南岸漫溢決口本境無不被
災舊城瀕河受患尤鉅居民多遷移他境謀食四方故戶口
較減

旗戶無

漢戶

全境四十二里共四百一十二村莊二萬六千七百三十二戶

男大口四萬六千九百八十八丁

男小口一萬六千六百零七丁

女大口四萬零三百六十口

女小口一萬五千六百二十三口

計男女大小共十一萬九千五百七十八口

齊東縣鄉土志目錄

卷下

氏族

宗教

實業

地理

山水

道路

物產

商務

氏族

李氏明初由棗強遷居青城縣三里莊 國初徙居齊東城內嗣因舊城被水居邑之新立長福鎮文爛以國學生官浙江紹興府同知世鑛以國學生官雲南石屏馬龍等州知州世鋼由附生官河南西華縣知縣敦業道光乙酉拔貢官至福建督糧道光業以國學生官廣東儋州崖州等州知州展業由增貢官工部員外郎繼業道光壬午武舉丙戌進士候選守備謹業由附貢官山西鮑店鎮縣丞署五寨縣知縣蔭棠由附貢生光緒乙亥孝廉方正官四川瀘州九姓鄉州判署忠州知州鍾瀛以國學生官廣西昭平縣知縣炳瀛由蔭生官廣東潮州府同知其

他遊庠食餼以孝友稱者甚眾

張氏原籍棗強明初遷邑之大張家莊後多散居各莊以耕讀傳家代有聞人民綱丁卯拔貢官直隸清河縣知縣陞山西應州知州滾隆慶戊辰拔貢任直隸良鄉縣縣丞陞山西蒲州知縣惟養 國初順治乙酉拔貢官至河南分守汝南道布政使司參政翼飛歲貢考授訓導任直隸州州同翼舉拔貢官河南寶豐縣知縣鐸康熙己卯舉人丙戌進士官湖北官陸縣知縣歷署應山縣孝感縣知縣陞德安府分府思恬甲戌舉人特簡湖南東安縣知縣繼補江西德化縣知縣署九江府同知思振由太學生歷任福建興化府通判臺灣澎湖通判建甯同知福州

海防同知陞浙江金華府知府爲韶附貢丙辰科舉孝廉方正其餘教諭訓導縣丞典史尤眾現傳至二十一世人丁蕃衍於邑推望族焉

王氏明初自棗強遷邑之竇八莊或散居城鄉以詩書孝友傳家璣以歲貢任江蘇六合縣知縣壯圖以貢生任雲南會澤縣知縣右彌由貢生任福建德化縣知縣歷陞知府旋擢臺灣兵備道兼理學政毓芳由廩貢官至潁州府知府其餘任教諭訓導者尤眾支姓繁衍亦爲邑之望族

成氏明洪武間由棗強遷邑之西鄉成家集或散居各村世敦孝友嘉靖時堯卿始以文學騰聲由貢生任江蘇蕭縣知縣隆慶

時文由貢生任山西壺關縣知縣龍池道光乙酉科舉人任利津縣訓導掖縣教諭署平度州學正其餘舉貢增附累世不絕李氏明初由直隸棗強遷居西鄉李家碼頭莊世以孝友傳家至

國朝雍正年支派繁增簪紱漸盛化龍乾隆二十五年以武進士廷試二甲擢御前侍衛由貴州都司陞遊擊補陝西副將授江南山東貴州廣東總鎮都督署福建水師營提督曰商乾隆庚寅舉人任榮城縣教諭毓桂乾隆丁酉武舉世襲騎都尉由沂州營都司陞廣西提督前營遊擊國棟世襲騎都尉道光元年由文登膠州臨沂水營都司陞高唐壽張營遊擊其他登乙科貢成均者尤眾現傳至二十一世

袁氏原籍棗強明初遷徙來齊傳至三世琪以鄉科任陝西三原縣知縣歷陞戶部郎中思忠丙午舉人任河南尉氏縣知縣陞高郵州知州以直道不容於權要調陝西綏德州知州不就致仕思振恩貢生任黃縣教諭支派蕃衍散居各村至今二十一世

宗教

回教無

天主教無

耶穌教 三十七人

釋教 一十七人

道教 二十一人

實業

士居十之一

農居十之六

工居十之一

商居十之二

地理

本境界周三百一十里面積一萬二千方里橫七十里縱四十餘里共地五千八百五十七頃自修遙隄開小清河共佔中地五百九十四頃應餘地五千二百六十三頃

縣境在府城東北一百五十里

東至鄒平縣界二十里至鄒平縣城四十里

西至章邱縣界五十五里至濟陽縣城七十里

南至章邱縣界二十五里至章邱縣城五十五里

北至惠民縣界三十里至惠民縣城一百二十里

東南至鄒平縣界二里至鄒平縣城四十二里

東北至青城縣界十八里至青城縣城三十五里

西南至章邱縣界五十里至章邱縣城六十里

西北至章邱縣界五十五里至濟陽縣城七十里

邑分四區治城附近曰禮字區東曰仁字區西曰義字區北曰智

字區

古蹟

故王臺 在縣治東南二里

麻姑臺 在縣治西二十五里

天子墓 在縣治西四十里甜水莊西北

皇后塚 在甜水莊北

伏生塚

在縣治西三十五里寄駕塚按山東稽古錄云今

齊東之寄駕塚是在鄒者疑塚也

文狀元墓

在縣治西南四十五里文家莊

王狀元墓

在縣治西北三十里舊城西南二里

萬戶侯墓

在縣治西二十八里孟家寺

太原侯墓

在縣治西北二十五里

耿通墓

在縣西南四十五里貫蘇鎮

賈炫墓

在縣治西南二十五里臨河鎮

李化龍墓

在縣治西四十七里李家碼頭

梁鄒城

在縣治東北十八里劉家鎮

魏王城

在縣治西四十里

延安城

在縣治西北四十五里延安鎮

東朝陽城

在縣治西伏生墓前

管城

在縣治西南三十八里管家廟

舊城

在縣治西北三十里自元升鎮爲縣迄光緒十九年黃河自城西抱城東趨防禦不支遂遷移於九

屬鎮

聖惠泉

在延安鎮

德異泉

在舊城學前

甘泉

在縣西十里河溝莊

五龍井

在縣治西南五十里五龍堂

遺愛井

在縣之西西南四十五里歸蘇鎮

七十二井

在歸蘇鎮

牧馬處

在縣治西南二十五里古傳齊無鹽牧馬於此

奎星樓

在舊城

文筆峯

在舊城

祠廟

聖廟大成殿

在縣治東北隅

東廡

西廡

啟聖祠

明倫堂

尊經閣

文昌宮

名宦祠

鄉賢祠

節孝祠

城隍廟

關帝廟

文宣王廟

在縣治西北隅

在縣治西南隅

一在延安鎮一在草廟頭

伏生祠

在寄駕塚

麻姑廟

在麻姑堂

坊表

萬世宗師坊

在舊城學前

三世錫命坊

爲張夢鯨建

在舊城

秉憲承恩坊

爲張夢鯨建

在舊城

忠愛坊

在舊署前爲黃邑侯建

聯芳坊

爲翟宏濟翟來旬建

亞魁坊

爲王淵建

聚奎坊

爲王文華建

擢英坊

爲張璣建

掄秀坊

爲孫珉建

附鳳坊

爲楊埜建

攀龍坊

爲趙淵建

世魁坊

爲喬愷建

光裕坊

爲張岳建

義民坊

爲鄭剛建

雙節坊

爲盧氏呂氏建在延安鎮

雙節坊

爲李氏建在大聖寺

貞節坊

爲李氏建在蘇莊

武顯將軍坊 乾隆時爲李化龍建

橋梁

淇水河爲橋七

張家橋 劉家橋 潘家橋 王家橋 曹家橋 成家橋

孟家橋 以上七橋因黃水淤塞謹存遺跡

減水河爲橋七

永濟橋 小南橋 齊家橋 魏家橋 高家橋 孟家橋

菅家橋 以上七橋黃水湮沒今廢

津渡

黃河津渡七

鄆家渡 延安渡 時家圈渡 高家圈渡 閻家渡 舊城

渡 魚王口渡

小清河津渡十四

五龍堂渡 趙奉站渡 歸蘇鎮渡 來牛莊渡 魏家橋渡

麻姑堂渡 劉家寨渡 飲馬莊渡 李家墳渡 水牛韓家

渡 鋼斧寨子渡 卜家道口渡 前劉家渡 坡莊渡

市鎮

縣之爲鎮者十

劉家鎮 距城二十五里

張虎鎮 距城二十五里

石店鎮

距城十二里

臨河鎮

距城二十五里

歸蘇鎮

距城四十六里

延安鎮

距城四十五里

曹務鎮

距城三十二里

雙堂鎮

距城二十五里

大聖寺鎮

距城十二里

長福鎮

距城三十里因城遷移附近商民於光緒二十

四年接堤築臺以立市廛商賈羣萃貿易隆盛遂成邑

之鉅鎮

境內設有集者二十二

衙前南街劉家鎮雙堂鎮大聖寺石店鎮

歸蘇鎮吳莊成家集趙奉站草廟鎮西柳寨

孟家寺延安鎮柴家店曹務鎮路家莊長福鎮

豆八莊舊城常家道口曹家碼頭

學堂

官立高等小學堂一處

公立初等小學堂五處

改良私塾三百二十九處

勸學所一處

工藝傳習所一處

山水

本境原屬曠野兩河之間悉爲平壤無高山峻嶺故不錄

小清河自光緒十一年撥義賑開濬由江蘇義紳嚴道作霖董其成者也上自黃台橫以洩歷下泉水迤東五十里會唐王道口河於鴨旺口廟前並爲一河北折而東三十五里至張家林北三里許與繡江下流二水合一號爲小清迤東五里至五龍堂西始入縣境又東八里歸蘇鎮十五里魏家橋又東二十里李家坟又十二里至坡莊入鄒平界內按此河船艇往來如織晝夜不息商甚賴焉且濟屬鹽務與南運鹽務皆由此搬運視昔

尤便則有裨於鹽政者更鉅

大清河卽今黃河按舊河情形西自苗家莊北入縣境東北直達
延安鎮由時家圈西北折而東至蕭家莊西又北折而直達舊
城西門外由鄭家莊仍北折而東繞城北門外迤東直達謝家
莊西再由王口北折而東直至史家莊東入青城地界總計
黃河之在本境紆迴七十餘里此大清河舊日之情形也今則
詳細查勘河身自延安鎮直達方家莊而時家圈等五莊俱在
河北岸矣又東新河身直冲舊城中間而東城西之鄭家莊劉
家圈又拋在北岸河身直冲謝家莊而東于王口吳家莊史家
莊又移於北岸自咸豐元年迄今五十餘載黃河之變遷如此

遙隄自光緒十年建築由章邑田家莊起東至馬仁子家止曲折本邑四十六里南離大清河三四里許不等因河淤填連年修築

電線光緒二十八年建於遙隄之上預備伏秋汛漲專報險工電杆電線綿亘四十六里與遙隄同

填河故道在縣城西南四十餘里章邑繡江河之北流也自南郭家莊西入縣境曲折二十五里北至延安鎮西入大清河自咸豐初年黃河入濟填河因之屢溢蒙炳臣蘇侯奉上憲諭築隄賴免水患者數載至光緒七年大清河道淤填漸高填水逆流爲患甚鉅河防黃統領派營官劉興勝將河口截塞計免黃流

隄旣之災而填水下注終無所歸爲害更甚及光緒十一年遷成南開小清河凡歷章諸泉由小清河入海而填河遂涸

減河故道一名陳愷溝成化年開濬引章邱白雲湖之水至管家莊入邑紆迴四十餘里至舊治東門外由永濟橋下入大清河自黃水入濟從橋下溢出爲災後經炳臣蘇侯塞橋口築隄防而減河遂廢至光緒年黃河決口境內屢被水災卽減河之故道亦迷

漯水故道自西濟陽境內崔氏城北東南入縣境經東朝陽故城南又東經伏生墓南入東北入鄒平界

舊黃河在臨河鎮玄武廟北元至元三十一年廟中碑文有古黃

河津渡之說昔有崖岸自滄桑屢變遺跡遂迷

土河故道在邑之西北鄉上接章邱野狐寨以至西柳寨入縣經
段家莊至草廟頭東接埧河遺跡今無

史公河康熙年章邱縣令史在篇由郝家溝開濬自西南入縣境
至于家店莊南接埧河邑人德之因名史公河今開口尚存

禦寇河在舊治西南三里明正德六年開濬以禦流賊南通減水
河北通大清河長二里許俗明乾河今廢

道路

東路 自縣城十里至孫家鎮入鄒平界

西路 自縣城六十里至田家莊入濟陽界

南路

自縣城七里至長槐家入鄒平界

北路

自縣城三十五里至大清河入惠民界

東北路

自縣城二十里至劉家鎮入青清城界

西北路

自縣城四十五里至大清河入濟陽界

東南路

自縣城至陳玉平家入鄒平界

西南路

自縣城十五里至吳莊入章邱界

物產

天然產

穀之屬

黍稷麥豆秫葛芝蔴玉蜀黍

蔬之屬

金簪生菜白菜菠菜葱韭茄蔓菁盧菹胡盧瓜

果之屬 桃杏棗梨石榴葡萄落花生

木之屬 松柏楊柳榆槐桑柘杜椿梧桐黃楊荆楸

花之屬 牡丹玉簪鷓冠迎春丁香月季芍藥葵菊木槿木棉

臘梅夜合

藥之屬 薄荷車前子牽牛瓜萋艾蒲公英槐角子地骨皮夏

枯草兔絲子益母草紫蘇蒼耳子牛旁子馬兜鈴金

銀花

獸之屬 馬牛騾驢犬羊豕猫兔獾狐狸刺蝟黃鼠

禽之屬 鷄鴨鵝鴿燕鵲布穀倉庚啄木鶴鷹烏鴉

鱗介屬 魚蝦蟹鯉鱉蛤蚧

製造產

植物製造綿布花毯草蓆貝麻子各種油俱常產然出數無幾
青城之桑條入本境編成筐篋等器皮可造紙葉可造煙此屬
特品

礦物製造有五色瓦原質係土泥搏成施以顏料而陶之光彩
晶瑩且耐久亦一特產

商務

鹽店每年額票四千張

酒店十八座

諸糧由大清河小清河往來運售原無定額

雜貨由羊角溝周村鎮運來銷行本境及他境

棉線布洋綿布銷行本境及運售京津諸處

條貨本境及鄰境皆銷售

落花生銷行本境及運售他境者甚多

草蓆貝銷行本境及章邱諸縣

跋語

欲俾人人自知愛國必先自愛其鄉始欲愛其鄉必先自知其鄉之山川人物如此欲施普通教育而鄉土志之纂修爲至要也特吾邑舊志修於康熙乙丑年至今二百餘歲未獲重修其間寧之淹沒者甚多況河水氾濫陵谷變遷較他邑尤甚兼之新政迭興諸事需款自去年奉到 上憲札飭令各縣鄉土志一律纂修因吾邑款項支絀未遑興辦迨 慕謙馬明府蒞任時至暑假約集四鄉紳耆各處採訪並設纂修局於高等小學堂中延請袁馥村趙仁村二先生檢閱冊籍調查檔卷按照定章秉公核實選錄成冊繼經 馬明府於辦公之暇刪繁就簡前後潤色共成二卷十

四章合邑之地理山河政績事業麟炳炳令吾人讀之而愛鄉
土之心可以油然而生矣果由此擴而充之愛國之心何難普及於
教育中哉宣統元年仲秋上旬繡川山人李炳炎謹跋